

Komunalnim preduzećima građani duguju milione maraka

# Sud pretvorili u agenciju za naplatu

Javna preduzeća treba da se potrude da se broj tužbi na sudu umanj

Na Općinskom sudu u Sarajevu nalazi se više od 760.000 tužbi putem kojih javna komunalna preduzeća potražuju svoja dugovanja od privatnih i fizičkih lica. Pretočeno u novac ispada da za komunalije Sarajlije duguju više od 60 miliona KM. Da li je broj neplatiša prikazan većim nego što jeste?

Javna komunalna preduzeća kategorično tvrde da su cifre tačne, a da su sudska potraživanja jedini legalni način na koji oni mogu da dobiju svoj novac. Ako se kojim slučajem na sudu nađe dug od nula KM, kriv je kompjuter, a ne neažurnost odgovornih u preduzećima. Međutim glavno pitanje se postavlja kako su ta preduzeća dozvolila da dođe do milionskih dugovanja.



Pisarnica u Općinskom sudu više liči na odlagalište papira

Iz KJKP *Vodovod i kanalizacija* dobili smo podatke da ukupan dug svih potrošača po ispostavljenim računima za utrošenu vodu i odvođenje otpadnih voda iznosi 54,3 miliona KM, a da se, shodno zakonu o obligacionim odnosima, na sudu trenutno nalazi oko 350.000 predmeta. Čovjek treba nakon ovih cifri da se upita kako oni uopće mogu da rade. Nešto lakša situacija je u KJKP *Rad*, gdje su građani dužni "samo" 2,5 miliona KM, a na sudu se nalazi oko 60.000 tužbi.

Sudija Općinskog suda **Milorad Krkeljaš** smatra da sud nije pravo rješenje za ovaj problem. Javna preduzeća bi trebala

da naprave dodatni napor pa da se broj tužbi na sudu umanjuje, tako što bi morali da organizuju svoje službe ili agencije koje bi se bavile naplatom prije suda kojim bi se tužbe smanjile i dozvolile ovom sudu da se bavi stvarnim problemima, a ne dugovanjima koja pretežno iznose manje od 20 KM.

"Dešava nam se da preduzeća poštom pošalju račun i ako stranka ne uplati na vrijeme račun oni to proslijede sudu, a da prije toga ništa sami ne pokušaju, nikakve radnje ne preduzimaju da bi naplatili ta dugovanja. Mi smo se kao sud pretvorili u njihovu agenciju za naplatu, a to je vrlo skupo.

Javna preduzeća nisu iscrpila sve mogućnosti da dođu do naplate, da ne zatrpavaju sud ovakvim tužbama. Problem je u njihovoj organizaciji. Skup je sudija, zapisničar, kurir. Kad odradimo određeni broj predmeta stranke nam dolaze da izraze svoje nezadovoljstvo. Tužba je došla a oni platili račun. Glavni problem je taj što su to javna preduzeća u kojima nema dovoljno discipline. Da su to privatna preduzeća ne bi dozvolili da im se nakupi milionski dug, jer ta firma ne bi postojala. Građani ne plaćaju, istina je, ali dozvoliti toliki dug je više nemarnost javnih preduzeća", kategoričan je Krkeljaš.

Činjenica je da će sud i dalje biti zatrpan predmetima, pisarnice i arhiva suda će još malo ličiti na papirne bunkere, a novac poreznik obaveznika će se trošiti na papire, tonere, poštanske pošiljke... Da smo na Zapadu najlakše rješenje za sve bilo bi da se neplatišama, dok ne izmire svoja dugovanja prema komunalnim preduzećima, zabrane nove finansijske transakcije. Znači, ko nije izmirio svoja dugovanja neće moći da registruje automobil, da učestvuje na tenderu, podigne kredit, dobije pasoš... Ali mi ipak živimo u Bosni i Hercegovini koja je još daleko od Zapada.



Da li su za ovo krivi građani ili preduzeća?

Foto: DŽ. KRIJEŠTORAC

L. RIZVANOVIĆ